

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
GRAD ZENICA**

Obradivač:  
Stručna služba Gradskog  
vijeća i Gradonačelnika

**PRIJEDLOG**

\*\*\*\*\*

**O D L U K A  
O KOMUNALNIM TAKSAMA**

\*\*\*\*\*

Zenica, decembar 2025. godine

Na osnovu člana 36. i 37. Zakona o principima lokalne samouprave ("Službene novine Federacije BiH", br. 49/06 i 51/09), a u vezi sa članom 13. stav (1) tačka c) i stav (3) Zakona o pripadnosti javnih Prihoda u Federaciji BiH ("Službene novine Federacije BiH", br. 22/06, 43/08, 22/09, 35/14, 94/15 i 17/22) i člana 21. tačka 6. Statuta Grada Zenica ("Službene novine Grada Zenica", broj 5/15), Gradsko vijeće Zenica, na \_\_. sjednici održanoj dana \_\_.2025. godine, donijelo je

## **ODLUKU o komunalnim taksama**

### **Član 1. (Opće odredbe)**

- (1) Ovom odlukom propisuju se komunalne takse koje plaćaju pravna i fizička lica za korištenje prava, predmeta i usluga na teritoriji Grada Zenica i utvrđuju obveznici, visina, olakšice, rokovi i način plaćanja komunalne takse.
- (2) Izrazi koji se koriste u tekstu Odluke odnose se na fizičke osobe i rodno su neutralni, odnosno podjednako se odnose na oba spola.

### **Član 2. (Obaveza plaćanja komunalne takse)**

Komunalna taksa plaća se za:

- a) držanje, odnosno korištenje sredstava za igru (bilijar, automati, fliperi, video igre, pikado, aparati za posebne igre na sreću, displeji/ekrani u kladionicama i sl.),
- b) održavanje/izvođenje žive muzike u ugostiteljskim objektima.

### **Član 3. (Obveznik i visina komunalne takse)**

- (1) Obveznik takse je pravno ili fizičko lice upisano u odgovarajući registar koje koristi pravo ili predmete za čije korištenje je propisano plaćanje takse ili pruža usluge za čije bavljenje je propisana taksa.
- (2) Visina komunalne takse utvrđuje se Tarifom komunalne takse koja je sastavni dio ove odluke.

### **Član 4. (Prijava i rok plaćanja komunalne takse)**

- (1) Taksa za držanje sredstava za igru obračunava se i plaća u godišnjem iznosu.
- (2) Obveznik takse za držanje sredstava za igru dužan je podnijeti prijavu i uplatiti taksu Poreznoj upravi - Kantonalni porezni ured Zenica - Porezna ispostava Zenica za tekuću godinu do 20. februara sa stanjem na dan 1. januar.
- (3) Izuzetno, obveznik takse za držanje sredstava za igru koji počinje sa radom tokom godine, odnosno poslije 20.02., prijavu za plaćanje takse podnosi do kraja mjeseca u kojem je stekao svojstvo obveznika i taksu plaća srazmjerno vremenu obavljanja djelatnosti.
- (4) Ukoliko obveznik ove takse prestane s radom u toku godine ima pravo na povrat takse za onoliko mjeseci koliko je preostalo do kraja godine poslije dana prestanka rada.
- (5) U prijavi takse obveznik obavezno navodi podatke: naziv, sjedište ili adresu, ID broj, broj računa, broj i vrstu sredstava za igru.

### **Član 5. (Zone)**

- (1) Iznos takse po tarifi komunalne takse utvrđuje se u ovisnosti od gradske zone u kojoj se nalazi poslovna ili druga prostorija, objekat ili mjesto subjekta - obveznika takse.

(2) Utvrđuju se gradske zone kako slijedi:

- a) EKSTRA ZONA koju čine ulice: Titova ulica i Trg Alije Izetbegovića,
- b) I ZONA koju čine ulice: Sarajevska do raskrsnice sa Bulevarom Ezhera Eze Arnautovića, Bulevar Kulina bana, Bulevar Kralja Trvtka I do Staničnog trga, ulice Dr. Aska Borića i Branilaca Bosne, te ulice koje se nalaze unutar kruga kojeg zatvaraju navedene ulice, a to su: Odmut, Dr. Mehmeda Spahe, Reisa Čauševića, Muftije Šemsekadića, Mujagića sokak, Sejmenska, Ekinovića put, Jalijski put, Vojvodića put, Jalimamov put, Hamdije Kreševljakovića, Šestića put, Begagića put, Šerbin sokak, Londža, Talića Brdo, Mejdandžik, Potok, Jevrejska, M. Seida Serdarevića, Stara čaršija, Huseina Kulenovića, Srpska mahala, Prusačka, Pišće, Studenac, Kočevska čikma, Kočeva, Mehmedalije Tarabara, Islambegovića put, dr. Safvet bega Bašagića, Kučukovići, Masarykova, Sestara Ditrih, Školska, Fra Ivana Jukića, Fra Grge Martića, Dr. Hasana Muminagića, Štrosmajerova do broja 56, Meokušnice, Uzunovića put, Armije BiH do broja 26, Trg Rudara, Trg Bosne i Hercegovine,
- c) II ZONA koju čine ulice iz naselja Blatuša: Željeznička, Zije Dizdarevića, Kranjčevićeva i Blatuša; naselja Crkvice: Aleja Šehida, Kamberovića čikma, Ivana Gundulića do Nogometnog centra, Čurukovića put, Derviša Imamovića, Trg žrtava fašizma, Crkvice i ulica Prve zeničke brigade; naselje Novo Radakovo: Bistua Nuova do broja 65 (paralelno sa benzinskom pompom u ulici Avde Smajlovića), Dr. Ćire Truhelke, Avde Smajlovića, Prvomajska do raskrsnice sa ulicom Klopčki put do broja 20, Mustafe Čauševića, te sljedeće ulice: Bilimišće, Ušće, Goraždanska, Lukovo Polje, Sarajevska do raskrsnice sa Bulevarom Ezhera Eze Arnautovića do broja 82 (objekat Rudnika), Zukići, Krivače, Zacarina, Fakultetska, Stjepana Radića, ZAVNOBIH-a do broja 88, Nurije Pozderca, Rujev Do, Travnička cesta do broja 80, Branislava Nušića, Fra Ljube Hrgića, Augusta Šenoe, Kotromanića, Zmaja od Bosne, Velikog sudije Građeše, Vatrogasni put, Nikole Tesle, Juraja Neidharta, Željezarska, Dr. Adolfa Goldbergera, Sandžačka, Saliha Čakana Mulalića, Bulevar Kralja Trvtka I od Staničnog trga i Stanični trg,
- d) III ZONA koju čine ulice koje se nalaze na području Grada Zenica, a nisu obuhvaćene prethodno navedenim zonama.

## Član 6.

### (Uplaćivanje komunalne takse)

Komunalna taksa predstavlja prihod Grada Zenica i uplaćuje se na račun Budžeta Grada.

## Član 7.

### (Tarifni broj 1.)

Za držanje sredstava za igre na sreću (slot automati i aparati za posebne igre na sreću, ekrani displeji u sportskim kladionicama) plaća se godišnja taksa po jednom komadu/aparatu, odnosno predmetu, kako slijedi:

ZONA	IZNOS TAKSE PO APARATU/KOMADU
EKSTRA ZONA	1.200,00 KM
I ZONA	1.000,00 KM
II ZONA	800,00 KM
III ZONA	600,00 KM

**Član 8.**  
**(Tarifni broj 2.)**

Za priređivanje zabavnih igara u ugostiteljskim objektima i drugim za tu svrhu namijenjenim prostorima na računarima, igraćim konzolama, simulatorima, automatima za video igre, fliperima, bilijarima i drugim sličnim automatima koji se stavljaju u pogon pomoću kovanog novca, žetona ili uz naplatu, a u kojima igrač ne može ostvariti dobitak u novcu, stvarima ili pravima, godišnja taksa po komadu/aparatu iznosi, kako slijedi:

<b>Vrste zabavnih igara</b>	<b>Extra zona</b>	<b>I zona</b>	<b>II zona</b>	<b>III zona</b>
Igre na računarima, igraćim konzolama, simulatorima, automatima za video igre, fliperima, bilijarima i drugim sličnim automatima (KM/komad/godišnje)	120,00 KM	100,00 KM	60,00 KM	40,00 KM

**Član 9.**  
**(Tarifni broj 3.)**

(1) Za organizovanje i držanje žive muzike, koncerata, izvođenje muzičkih programa, scenskih nastupa i sl. za koje se vrši prodaja ulaznica plaća se 500,00 KM po svakom nastupu za estradne umjetnike i druge izvođače koji su u prethodnoj godini ostvarili prihod u iznosu većem od 20.000,00 KM prema prijavi poreza na dohodak (GPD-1051).

(2) U slučajevima kad je prihod iz prethodnog stava u manjem iznosu od 20.000,00 KM, iznos takse po svakom nastupu je 250,00 KM.

(3) Obveznik takse je pravno ili fizičko lice/organizator i dužan je taksu uplatiti prilikom podnošenja prijave nadležnoj poreskoj ispostavi - Ispostava Zenica.

(4) Uz prijavu se podnosi dokaz o ostvarenom prihodu/dohotku u prethodnoj godini pribavljen od nadležnog poreskog ureda, domaćeg ili inostranog.

(5) Prijava se podnosi najkasnije tri dana prije održavanja događaja.

**Član 10.**  
**(Nadzor)**

Nadzor nad provođenjem ove odluke u pogledu prijave, obračuna i plaćanja takse kao i prinudnu naplatu u slučaju neplaćanja vrši nadležni porezni ured na teritoriji grada Zenica.

**Član 11.**  
**(Kaznene odredbe)**

(1) Novčanom kaznom u iznosu od 2.000,00 KM kaznit će se za prekršaj pravno lice koje u roku iz člana 4. i 9. Odluke ne prijavi ili ne plati iznos obračunate takse.

(2) Novčanom kaznom u iznosu od 1.000,00 KM kaznit će se za prekršaj odgovorno lice u pravnom licu koje u roku propisanom članom 4. i 9. Odluke ne prijavi ili ne plati iznos obračunate takse.

**Član 12.**  
**(Započeti postupci)**

Postupci razreza visine takse koji nisu obračunati do dana stupanja na snagu ove odluke bit će okončani prema odredbama Odluke o komunalnim taksama ("Službene novine Grada

Zenica”, br. 2/15, 4/15, 1/17, 9/17, 1/18, 3/18, 1a/19, 4/20 i 2/21) ukoliko nisu u suprotnosti sa Mišljenjem Ustavnog suda Federacije Bosne i Hercegovine (“Službene novine Federacije BiH”, broj: 33/25).

### **Član 13.**

#### **(Prestanak važenja)**

Danom stupanja na snagu ove odluke prestaje da važi Odluka o komunalnim taksama (“Službene novine Grada Zenica”, br. 2/15, 4/15, 1/17, 9/17, 1/18, 3/18, 1a/19, 4/20 i 2/21).

### **Član 14.**

#### **(Stupanje na snagu)**

Ova odluka stupa na snagu osmog dana od dana objavljivanja u “Službenim novinama Grada Zenica”.

Broj: 01-\_\_\_\_\_/25  
Zenica, \_\_\_\_\_ 2025. godine

**PREDSJEDAVAJUĆA  
GRADSKOG VIJEĆA**

Snježana Vrhovac

## **OBRAZLOŽENJE**

### **I PRAVNI OSNOV**

Pravni osnov za donošenje ove odluke sadržan je u:

- a) odredbama člana 36. i 37. Zakona o principima lokalne samouprave ("Službene novine Federacije BiH", br. 49/06 i 51/09) prema kojim jedinice lokalne samouprave (općine i gradovi) donose propise o naknadama i taksama i provedbene propise o oporezivanju, te se utvrđuje koji to prihodi pripadaju jedinicama lokalne samouprave, a u članu 37. stav (1) tačka a) alineja 2) istog Zakona precizno se navodi da Vijeće utvrđuje iznose lokalnih taksa i naknada u skladu sa Zakonom. Osim toga članom 13. stav (1) tačka c) i stav (3) Zakona o pripadnosti javnih prihoda u Federaciji BiH („Službene novine Federacije BiH“, br. 22/06, 43/08, 22/09, 35/14, 94/15 i 17/22) je propisano da jedinicama lokalne samouprave osim udjela u raspodjeli javnih prihoda pripadaju i naknade i takse u skladu sa propisima jedinica lokalne samouprave koje donose općinska/gradska vijeća.
- b) odredbama člana 21. tačka 6) Statuta Grada Zenica ("Službene novine Grada Zenica", broj 5/15) kojim je propisano da Gradsko vijeće u okviru svoje nadležnosti donosi propise o porezima, taksama, naknadama i doprinosima u skladu sa Zakonom.

### **II RAZLOZI ZA DONOŠENJE ODLUKE**

Razlozi za donošenje Odluke o o komunalnim taksama proizilaze iz činjenice da je Ustavni sud Federacije Bosne i Hercegovine utvrdio konačno i obavezujuće mišljenje, broj: U-6/25 od 09.04.2025. godine („Službene novine Federacije BiH“, broj: 33/25) prema kojem „obaveza plaćanja komunalne takse /naknade na istaknutu firmu“ nije u skladu s Ustavom Federacije Bosne i Hercegovine.

Predmetnim mišljenjem Ustavnog suda Federacije Bosne i Hercegovine utvrđeno je:

- a) kantonalne skupštine, gradska i općinska vijeća na teritoriji Federacije Bosne i Hercegovine koje propisuju obavezu plaćanja komunalne takse/naknade za isticanje firme dužni su u razumnom roku iz svojih propisa ukloniti odredbe kojima se propisuje komunalna taksa/naknada na istaknutu firmu i utvrđuje obaveza plaćanja komunalne takse/naknade na istaknutu firmu,
- b) svi organi uprave i sudovi u Federaciji Bosne i Hercegovine dužni su prilikom odlučivanja o obavezi plaćanja komunalne takse/naknade na istaknutu firmu postupati u skladu s ovim mišljenjem i ne primjenjivati propis kojim se utvrđuje obaveza plaćanja komunalne takse/naknade na istaknutu firmu.

Slijedom citiranog Mišljenja Ustavnog suda Federacije Bosne i Hercegovine valjalo je pristupiti izmjeni, odnosno izradi nove Odluke o komunalnim taksama Grada Zenica iz koje su uklonjene odredbe o „taksi na istaknutu firmu“, odnosno kojom nije regulisana komunalna taksa na istaknutu firmu.

### **III OBRAZLOŽENJE PRAVNIH RJEŠENJA**

Članovima od 1. do 6. Odluke definira se obuhvat regulacije, vrste komunalnih taksi, obveznici, način utvrđivanja i obračuna iznosa, prijava i rok za podnošenje prijave.

Članovima 7., 8. i 9. Odluke utvrđuje se iznos takse po zonama za tarifni broj 1. te iznosi takse za tarifni broj 2. i tarifni broj 3.

Članom 10. Odluke propisuje se ovlaštenje za vršenje nadzora na provođenjem Odluke.

Članom 11. Odluke propisuju se kazne za pravno lice i odgovorno lice u pravnom licu za prekršaj kod kršenja odredaba o rokovima za podnošenje prijave komunalne takse.

Članom 12. Odluke propisuje se postupanje nadležnog organa u postupcima razreza komunalne takse pokrenutim prije stupanja na snagu ove odluke, a u skladu s Mišljenjem Ustavnog suda Federacije Bosne i Hercegovine, broj: U-6/25 od 09.04.2025. godine ("Službene novine Federacije BiH", broj: 33/25).

Članom 13. Odluke utvrđuje se prestanak važenja Odluke o komunalnim taksama ("Službene novine Grada Zenica", br. 2/15, 4/15, 1/17, 9/17, 1/18, 3/18, 1a/19, 4/20 i 2/21), a članom 14. Odluke stupanje na snagu ove odluke.

### **IV FINANSIJSKA SREDSTVA POTREBNA ZA PROVOĐENJE ODLUKE**

Za provođenje ove odluke nisu potrebna posebna sredstva iz Budžeta Grada Zenica.

### **Izvještaj o provedenoj javnoj raspravi**

Gradsko vijeće Zenica je na sjednici održanoj 24.11.2025. godine razmatralo i utvrdilo Nacrt Odluke o komunalnim taksama i isti uputilo na javnu raspravu.

U javnoj raspravi koja je trajala 15 dana gradski vijećnici su ukazali na potrebu izmjene određenih odredaba Nacrta Odluke, a u raspravi su uzeli učešće i drugi subjekti i to:

1. Udruženje estradnih izvođača Zeničko-dobojskog kantona.
2. Udruženje građana "Zona muzike".
3. Udruženje poslodavaca Zenica.
4. Naša stranka.
5. Vijećnik Ernad Bešlagić.
6. Edo Šehović, Ahmed Fazlić, Maid Pivić, Muhamed Delić, Zoran Čurić, Samir Lemeš, Kristijan Letić, Nataša Čobanović, Danijela Čurić, Alma Lisica, Larisa Šaćirović, Nina Kolar i Zerina Marjanović.
7. Vijećnik Almir Dračo.

Dostavljeni prijedlozi, primjedbe i sugestije, u principu, se odnose na član 7. i 8. Odluke kojima je regulisana taksa na sredstva za igre – igre na sreću i druge zabavne igre, te taksa na držanje žive muzike.

Većina prijedloga, primjedbi i sugestija ukazuje na potrebu da se odvojeno regulira taksa na igre na sreću, kladionice i sl. od zabavnih igara (bilijari, pikado i sl.) i da se progresivno povećaju takse na igre na sreću u odnosu na zabavne igre.

Drugi značajan broj primjedbi, prijedloga i sugestija odnosi se na tretman organizovanja i držanja žive muzike u ugostiteljskim objektima s izraženom intencijom da se odvoje komercijalni sadržaji od uobičajenog izvođenja žive muzike u prigodnim prilikama i u manjim objektima.

Određeni podnosioci primjedbi, prijedloga i sugestija ukazali su na korisne društvene aspekte organizovanja prigodnih muzičkih sadržaja u kojima izvođači nisu estradne zvijezde već učenici i studenti muzičkih škola i lokalni muzičari, te da je potreban liberalniji pristup i oslobađanje od takse u takvim prilikama.

Stručna služba kao obrađivač primjedbi, prijedloga i sugestija je prilikom obrade istih obavila konsultacije sa određenim podnosiocima, te predstavnicima tri kluba vijećnika po njihovoj inicijativi, pa je usaglašen sadržaj i pronađen najmanji zajednički sadržilac, odnosno intencija većeg dijela predlagača i sačinila Prijedlog Odluke uvažavajući suštinske zahtjeve.

U tom su smislu utvrđeni povećani iznosi za uređaje za igre na sreću, redefinirani iznosi za zabavne igre, a organizovanje i držanje žive muzike ograničeno na muzičke sadržaje koji imaju komercijalni karakter uz povećan cenzus prihoda za izvođače kao osnov kod određivanja visine takse.

Dakle, uvažavajući primjedbe, prijedloge i sugestije navedenih učesnika u raspravi sačinjen je Prijedlog Odluke o komunalnim taksama sa novim sadržajem članova 7., 8. i 9. koji sadrže odredbe o iznosima takse za tri tarifna broja.